



## **Täsivääldi president vaaljah 2018**

Suomâ aalmugjesâneh väljeje president vaaljâin kuudâ ive kooskâi.

### **Vuossâmuš vaaljâ:**

- Vaaljâpeivi lii pasepeivi 28.1.2018
- Munejenâdem Suomâst 17.–23.1.2018
- Munejenâdem olgoenâmijn 17.–20.1.2018

### **Máhđuláš nubbe vaaljâ:**

- Vaaljâpeivi lii pasepeivi 11.2.2018
- Munejenâdem Suomâst 31.1.–6.2.2018
- Munejenâdem olgoenâmijn 31.1.–3.2.2018

### **President pargoh**

President nannood laavâid, maid ovdâskodde lii tuhhiittâm.

President joođeet Suomâ olgopolitiik oovtâst haldättâssáin.

President noomât uáiviminister já eres ministerijd pargoidis. Laseen president noomât tuámárijd já motomijd ollâ virgealmaid.

President lii meid Suomâ piäluštâsvuoimij pajehovdâ. Suáđist já ráávhust president meerrid ovdâskode mietâmâššáin.

### **Kii uázžu jienâstid?**

Tun puávtáh jienâstid presidentvaaljâin,

- jis tun lah Suomâ aalmugjeessân
- jis tun lah tiävdám 18 ihheed majemustáá 28.1.2018.

## **Kiäm tun puávtáh jienâstid?**

Piäláduvah já väljeijeeseervih pyehtih asâttid iävtukkâsâid presidentvaljáid. Iävtukkâs kalga leđe Suomâ aalmugjeessân. Jyehi iävtukkâsâst lii jieijâs nummeer. Presidentiävtukkâsah láá iävtukkâssân oles enâmist, te tun puávtáh jienâstid kiäm peri iävtukkâs. Tiäđu presidentiävtukkâsâin tun finnih ovdâmerkkân loostâin, televisiost já internetist.

## **Almottâskorttâ puátá pááikán**

Jis tun lah jienâvuogâdvođâlâš, te tunjin vuolgâttuvvoo reivâ pááikán. Reeivâst láá kyehti almottâskorttâ, ko presidentvaaljâin sâttih leđe kyehti jienâstem.

Almottâskorttâin lii tiätu tuu jienâstemsaajeest vaaljâpeeivi. Mieli lii meid luvâttállâm munejienâstemsoojijn.

## **Ohtâ teikâ kyehti jienâstem**

Presidentvaaljâin puáhtá leđe kyehti jienâstem. Jis kiinii iävtukkâsâid finnee vuossâmuu jienâstmist paijeel pele jienâin, te sun väljejuvoo presidenttin.

Jis kihheen iävtukkâsâid ij finnie paijeel pele jienâin, te uárnejuvoo nubbe jienâstem.

Vuossâmuš jienâstem lii 28.1.2018.

Máhđulâš nubbe jienâstem lii 11.2.2018.

## **Päikkijienâstem**

Jis tun lah vaigâdâvt vâdulâš teikâ kuhesáigásávt pyeccee, te tun puávtáh jienâstid muuneeld päihistâd. Päikkijienâstmist tun finnih lase tiäđu tuu jieijâs kieldâ kuávdášvaaljâlâvdikoddeest. Lâvdikode puhelinnummeer lii almottâskorttâst.

## **Návt tun jienâstah muuneeld**

Tun puávtáh jienâstid presidentvaaljâin muuneeld mon peri munejienâstemsaajeest. Munejienâstem lii 17.–23.1.2018. Jis presidentvaaljâin uárnejuvoo nubbe jienâstem, ton munejienâstem lii 31.1.–6.2.2018.

Vääldi jienâstmân fáárun persovntuođâštus, ovdâmerkkân paasâ, persovnkoortâ teikâ vyeijimkoortâ.

1. Čääiti persovntuođâštus vaaljâvirgeulmui.  
Virgeolmooš täärhist tom já addel tunjin jienâstemliipu.
2. Vääldi jienâstemliipu fárustâd já moonâ jienâstemkoopin.  
Čääli jienâstemliipun čielgâsávt ton iävtukkâs nummeer, kiäm tun jienâstah.  
Ele čääli jienâstemliipun maiden muide.
3. Maacâst jienâstemliipu kaskoo.
4. Maacâ vaaljâvirgeulmuu luus.  
Sun stemppâlist jienâstemliipu  
já addel tunjin ruškis vaaljâkooveert.  
Piejâ jienâstemliipu kovertân já lijmee kooveert kiddâ.
5. Vaaljâvirgeolmooš pivdá tuu čäälliđ vuálá luámáttuv.  
Vuáláčälímáin tun nonniih, ete tun lah jieš tiävdám jienâstemliipu,  
finnim toos stemppâl já toppâm tom kovertân.
6. Loopâst vaaljâvirgeolmooš tappa vaaljâkooveert já luámáttuv fiskis vuolgâttâskovertân.

Ko tun lah jienâstâm, te tun puávtáh vyelgiđ jienâstemsajeest.

### **Návt tun jienâstah vaaljâpeeivi**

Vaaljâpeeivi jienâstemsajeh láá ávus tijme 9–20. Täärhist almottâskoortâst, kost tuu jienâstemsaje lii.

Vääldi jienâstmân fáárun persovntuođâštus, ovdâmerkkân paasâ, persovnkoortâ teikâ vyeijimkoortâ.

1. Čääiti persovntuođâštus vaaljâvirgeulmui.  
Virgeolmooš täärhist tom já addel tunjin jienâstemliipu.
2. Vääldi jienâstemliipu fárustâd já moonâ jienâstemkoopin.  
Čääli jienâstemliipun čielgâsávt  
ton iävtukkâs nummeer, kiäm tun jienâstah.  
Ele čääli jienâstemliipun maiden muide.
3. Maacâst jienâstemliipu kaskoo.

4. Maacâ vaaljâvirgeulmuu luus.  
Sun stemppâlist jienâstemliipu.

5. Koočât tuu jienâstemliipu vaajâuurnán.

Ko tun lah jienâstâm, te tun puávtáh vyelgiđ jienâstemsaaajeest.

### **Kiäst tun finniih iše?**

Vaaljâvirgeulmuuh rävvejuh tuu vaaljâsaaajeest sehe munejienâstmist ete vaaljâpeeivi.

Vaaljâsaaajeest lii meid vaaljâišedeijee. Tun puávtáh pivdeđ suu iššeen jienâstemkoopin, jis tun jieš jieš paste tevdiđ jienâstemliipu.

Vaaljâišedeijen puáhtá toimâđ meid olmooš, kiäm tun lah jieš valjim, ovdâmerkkân perruujessân teikâ aldaolmooš. Išedeijee ij kuittâg uážu leđe iävtukkâs teikâ iävtukkâs aldaolmooš. Vaaljâišedeijee ij uážu mainâstiđ kiästen, ete kiäm tun jienâstih.

### **Vaaljâsyeligâsvuotâ**

Juáhâš meerrid jieš, ete haalijd-uv sun jienâstiđ já kiäm sun jienâst.

Vaaljâsyeligâsvuotâ meerhâš meid tom, ete tun jieš taarbâš mainâstiđ kiästen, ete kiäm tun jienâstah.

Jienâst presidentvaaljâin!

Lasetiätu jienâstmist:

vaalit.fi